



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Gründtliche Außklopfung/ vnd Zerstöberung/ Der groben
Handgreifflichen Lüge[n]dünst/ JrrNebel vnd
Ketzerdämpff/ Mit welchen sich Balthasar Mentzer die
Paderbornische CommunionFackel zuvertunckelen ...**

J. F. G.

Paderborn, 1616

Das Ander Cap. Was in diesem Puncten von der Communion Streitbar und
disputierlich sey.

urn:nbn:de:hbz:466:1-33951

Das Ander Cap.

Was in diesem Puncten von
der Communion Streitbar vnd
disputierlich sey.

Damit wir allen weitge-
suchten Umbschwanz hin-
dan gesetzt / vns dem Hauptstreit
fürderlich näheren.

So wissen / erkennen vnd bekenn-
en wir Catholischen vns pflichtig
vnd schuldig / allen vnd jeden Gebot-
ten Gottes gehorsamblich zugeles-
ben / vnd bestes vermögens nach-
zusetzen. Dieser Pflicht vnd Oblis-
gation kan vns weder Papst noch
Bischoff / weder Kirch noch Conci-
lium entlassen / freysprechen / los-
der ledig zehlen / da gilt weder Priui-
legium noch Dispensation, weder

54 Vertheidigung der Communion
Gewonheit noch Præscription.
Was GOTT gebent / kan vnd soll
kein Mensch verbletē / Das wil steiff/
vest / trewlich vñ vnuerbrüchlich ge-
halten seyn.

Demnach da vns ein Göttlich
Gebott / welchs alle Christen zu bey-
den Gestalten obligiret vnd verbind-
det / könnte auffgewiesen vnd vor Au-
gen gelegt werden / hette dieser Krieg
schon ein Loch / müsten vnd wolten
wir die Schantz auffgeben / euch be-
treten / vñ zum Hussitischen Kelch
paner geloben vnd schweren.

Ob nun wol Menzger sich gewal-
tiger Schwerdstreich außthut / dem
Leser mit prächtigem verheissen das
Maul weit außspreitzet. Als wöl-
le er vns mit der Nasen auff solches
Gebott stossen / So ist doch weder

ihm

ihm / wann er sich auch drüber an
 bitterm Todt legen solte / noch allen
 Jüderischen Predigkanten vnd Plo-
 dranten / wann sie schon vber einen
 Hauffen in einem Mörser pulueri-
 sirt / vnd durch ein Kolben ad quino-
 tam essentiam distillieret würden /
 weder Christlich / noch Menschlich
 noch möglich solches Gebott auff-
 zubringen vnd darzuthun. Erhense-
 ren / sag ich / stazgen vnd erstummen
 wirt diser hochbrumender Schnar-
 cher / wann es an ein demonstrieren
 vnd fürzeigen gehet.

Diz ist nun das Weiß an der
 Scheiben / Menzher / darnach du zte-
 len vnd schliessen mustest / das ist der
 Graben darüber du springen must /
 das istis Kinglein darnach du ste-
 chen mustest / Weisen mustest du / sag

56. Vertheidigung der Communion
ich einen Göttlichen Befelch / wel-
cher glatt allen Christen durch die
Banck in beyden Gestalten zu com-
municiren aufflegt vnd entbindet.

Wosern du das thust / wollen
wir vns lenger nit sperren noch hal-
ten / sondern unsere Behr abgürten /
die Wassen niederlegen / vnd feim
demütig zum Creutz kriechen / Kir-
chenräuber vnd Kelchdieb / für wel-
che du vns außgeschryen / vnd vor
aller Welt verlästert hast / seyn vnd
bleiben / vnd diese sonst atrocissima
iniuriam mit gedültigem stillschweigen
vertrucken vnd verschmerzen.

Auff den widrichen Fall aber /
daß du nemblich / ob deinem Ruhm
rettigen außgeben erstickest vnd erli-
gest / die Prob hincken vnd sincken /
vnd den kalte Siechttag haben wilt

sein

in Einer Gestalt.

57

kein Gebott / wie es dann vnmüg-
lich / auffbringest vnd demonstirest /
sollst du / Menzger / dein Maul zur
Tasche mache / die garstige Schand-
brocken / welche du wider die Kirch
Gottes feindselig heraus gespyen
hast / wider einschlucken wie ein
schleuniger Gerberghundt / oder a-
ber zu ewigen Tagen ein schändtli-
cher Verleumbder vnd Ehrendieb
seyn vñ bleiben / vnd dieses Brand-
mal mit dir in dein leydige Gruben
tragen. Das vnd kein anders.

Da versuche nun dein Heil / da
spanne alle dein witz vñ kunst dran /
Es gilt dir dein Ehr vñ Leumbden /
so viel du deren noch im Nest hast.
Nun frisch auff / munder dran / Wz
krakstu dich lang hinder dem Kopff /
Frisch gezuckt ist halb gefochten.

D s

Da

58 Vertheidigung der Communion
Da Fuß an Fuß / da Mann an Mann /
Wer ihm fürchtet leg ein Banner an.

Das Dritte Capittel.

Ob beyde Gestalten allen
Christen zu niessen ge-
botten?

Der Erste Articul.

Wo man des Kelchgebots
gesinnen soll.

Ihrem vermeinten Kelchge-
bott / pflegt vnser Gegen-
theil an vnderchiedlichen
Orten Göttlicher Schrift nach zu
graben. Etliche / vnd benändtlich
die Böhmen oder Hussiten / suchens
im sechsten Capittel S. Johannis
in denen Worten: **W**erdet jr nit
essen das Fleisch des Menschen
Sohns / vnd trincken sein
Blut /